



Dapi intgins onns ospitants da vaglia: Linus e Therese Arpagaus da la Casa Fausta Capaul a Breil.



Be il meglier ed il pli bun è vegni servi.



Il star cuschinier Andreas Caminada.



Segnan per l'ediziun dal magazin: Ralph Lindenmann e Wolfram Meister (da san.).



Er da la partida: Franz Sepp Caluori, il president da Gastro Grischun.



Rainer Maria Salzgeber, il moderatur dad SRF, ha manà tras il program.



Manuel Reichenbach, il cuschinier da Trun, ha er cuschinà a chaschun da la preschentaziun dal nov magazin «Graubünden geht aus».

FOTOS G. N. STGIER

Dal luxus fin tar il pli modest

Il nov magazin per gourmets «Graubünden geht aus» è cumpari

DA GION NUTEGN STGIER / ANR

■ **Tenor ils experts cun buccas e nas fins en l'Engiadina e la Surselva duas regiuns per mangiabains. Er Lai, Arosa e Tavau han ina ferma gastronomia. Quai almain croda en ègl cun sfegliar en l'ediziun 2017/18 da «Graubünden geht aus», il magazin che vul animar persunas dad ir ordaiifer a mangiar.** A Tschierschen ha gi lieu dumengia saira la preschentaziun dal magazin «Graubünden geht aus». Da la partida tar la preschentaziun dal nov magazin per persunas che mangian e baivan gugent bun e bain è danovamain stada ina societad illustra. Cumparida è gia la 7. ediziun da «Graubünden geht aus» e Wolfram Meister, il redatur principal, ed ils experts han visità radund 130 restaurants en tut las regiuns da noss chantun. A la fin han els fatg la schelta e tschernì quellas 100 bunas adressas che meritan grazia a la buna cuschina ed al bun servis da cumparair en il magazin da quest onn. Gist 43 restaurants en vegnids tiers da nov e da quels sa chattan tuttina blers en regiuns rumantschas da noss chantun. Sin fundament da quai dastgain nus bunamain dir che nossas regiuns en in vair paradì per mangiabains.

Da 100 bunas adressas gist 35 en l'Engiadina'Auta

In eldorado per persunas che mangian e baivan gugent e bain è anc adina l'Engiadina e cunzunt San Murezzan. Dals 100 restaurants che figureschan en l'ediziun 2017/18 da «Graubünden geht aus» sa chattan 35 tranter Maloja e Zernez. Be a San Murezzan han ils experts cun buccas e nas fins scuvert radund 25 restaurants cun ina cuschina eccellente e particulara. Cunzunt tranter las top adressas dal Grischun en intginas da quellas a San Murezzan e conturn, vul dir cun puncts e chapitschas en in cuntin. Bleras da quellas ustarias da noblezza sa chattan lura en ils hotels da tschintg e quatter stailas sco il Palace, Kulm e Suvretta.

Chasas da renum

Gist 12 restaurants cun ina buna cuschina han ils auturs ed experts chattà en Surselva, dentant che en Surses han els scuvert be in bun restaurant ed en Val Alva tuttina anc tschintg bunas adressas per mangiabains. Da la Surselva han cunzunt chasas da renum e da tradiziun survegni in plaz en la nova ediziun da «Graubünden geht aus». En ègl croda qua segir che per la buna cuschina en quels restaurants

sursilvans segnan gist ils patrums sez, quai ch'è oz per mintga travagl da gronda valur, cunzunt cun la mancanza da cuschinunz. A la front da las bunas adressas en Surselva en lura las patrinas ed ellas en quellas che guardan bain dals giasts e tgran er quels. En la gastronomia è quai da preschent il dretg recept e gist quel savess betg esser meglier tar ils restaurants da la classa superiura en Surselva. Per be numnar intgins: Tödi Trun, Postigliun Andiast, Casa Fausta Capaul Breil, Stiva Veglia Schnaus, Mulania Laax e Casa Alva Trin etc.

Arosa e Tavau en sa fatgs

La top adressa per gourmets en il Grischun è anc adina il restaurant Schauenstein a Farschno, la chasa nua che Andreas Caminada, il cuschinier lumnezian, chaschuna gia intgins onns cun ses team per aventuras culinarias. Adina dapli bunas adressas han ils 15 experts che scrivun lur contribuziuns per il magazin «Graubünden geht aus» er scuvert ad Arosa ed a Tavau. Dentant er da Cuir fin Maiavilla è la gastronomia er da gronda qualitat. Tut en tut è noss chantun in mund per mangiabains e quai dal restaurant da luxus fin la pli simpla baita en in vitg.



Da preschent il meglier cuschinier a Lai: Thomas Walz dal Guarda Val.